

本朝分省人物考

人物考卷之二十九目錄

南直隸鎮江府

秦從龍

郭任

沈固

施禮

虞謙

譚廣

盛祥

王振

胡清

儲懋

段敏

費閭

丁璣

靳貴

卻永

王臬

唐侃

呂高

王燦

王樵

王宗茂

姜寶

張祥鳶

王堯封

潘自新

于孔兼

本朝京省人物考卷之二十九

南直隸鎮江府

秦從龍

秦從龍字元之鎮江人丙申王師下金陵遣大將軍達下鎮江上謂達曰鎮江有秦元之者才器老成當詢訪致吾欲見之意達至鎮江物色得之時從龍有從孫永爲達部軍因遣還報上喜甚命兄子文正及朱文忠以白金文綺聘之從龍遂與妻陳氏偕來上親至龍江迎入時上寓王綵帛家因邀同處朝夕訪以持政從龍盡言無隱旣而上卽元故

御史臺爲府居從龍西華門外事無大小悉與諮謀  
密書漆板問答左右皆不知 上稱先生而不名每  
歲從龍生日 上與太子皆有贈遺或親至其家與  
之燕飲禮遇甚厚乙巳從龍從子澤死告還鎮江  
上出郊握手送之是年十二月從龍卒年七十餘  
上聞驚悼未幾督兵至鎮江親臨哭之命有司厚卹  
其家

### 郭任

郭任丹徒人洪武中以人才薦用三十一年拜戶部  
左侍郎勤於職事凡飲食起居俱於公署雖間過私

第亦不久淹一時能聲廉譽達於宸聽靖難師至江  
力主抗禦之策師入城不屈戮死其子經亦處斬次  
子金山保發戍廣西至次年併三女俱殺之嘉靖中  
知府劉儲秀立祠崇祀

### 沈固

沈固字仲威丹陽縣人生而岐嶷八歲里師授之書  
一過輒成誦時太祖初製大誥三編命有司選民  
秀課讀之固方九歲卽與選以例召赴闕試之終  
篇無遺謬賜實楮十錠以還及年十一補邑庠生甫  
弱冠遂領京闈鄉薦丁外艱服闋上春官入選理刑

內臺擢同知山東沂州事始臨民爲政自卓有能聲  
搜剔蠹吏莫敢以年少易之嶧人齊泰以沂西寶山  
社產銀鑛言於朝請官置局役民采辦以富國詔下  
固踏勘固執奏故坑及泉通海不可得鑿鑿新坑爲  
力旣艱且鑛有無不可知卽使其有費重而利輕又  
恐民勞致變不如勿開便詔罷之永樂甲午徵入爲  
戶部員外郎乙未奉勅使廣海整理鹽課議者以  
課久而虧將坐官吏以侵欺國課法固謂鹽之積在  
倉久則必自消折以此罪人非明主意事遂釋丁  
酉進正郎辛丑拜山東右叅政督餉給軍會仁宗

登極命以本官同武安侯鄭亨督軍事鎮大同 賜  
璽書以行宣德丙午命與武安及叅將曹儉統兵行  
邊設險爲備其規畫多出於固 宣宗嘉之庚戌召  
赴 闕計議邊餉事稱旨辛亥建白安邊四事從之  
有言大同人私闢土田自封殖而未輸官者 詔遣  
兵部侍郎柴車御史熊鐸翼往看定畝起科固以地  
薄而賦重人所不堪且戎事方殷宜從寬大爲言乃  
得減輕其半人賴以安 英宗初位固上言北虜屢  
入寇邊迄今未已緣以虜情狡詐我軍守西彼則擊  
東及我之東彼則復西 勅旨戒其窮追恐虜漸生



輕慢且使官軍勇者爲之喪氣怯者得以飭詞是致  
功效無成邊患不息臣以謂不探虎穴不得虎子今  
後遇虜之入許令追襲相機而行彼衆我寡則臨邊  
固守我強彼弱則出境窮追乘彼不虞且擣巢穴仍  
令間諜密探賊踪官軍奮勇取勝連出數次賊必瓦  
解縱未得利亦使軍威遠振疏上從之丁巳奉 勅  
會同征西前將軍方政遊擊將軍楊洪統兵護送朝  
貢使臣出境因絕漠度赤山追勦叛虜而還己未疏  
上十事皆備邊制虜要務辛酉 命兼綜理兵食二  
事尚方特鑄總督邊儲印記畀之復陳邊計以兵之

所需惟糧爲急將欲安邊當務久計又因阿魯台部  
爲脫歡所破餘衆竄於我邊不無鼠竊狗偷之患而  
脫歡又復驕矜虎視中原將有覬覦之意至厯聖  
慮添調軍馬運蓄貲糧邊圉嚴於扞衛蒸庶煩於供  
億近以二虜一滅一死稍得寧息將卒燕閑然以數  
萬之衆坐費民供則於國計非便臣在邊年久頗知  
其要大同地利其中路有青楊林馬頭山等處西路  
有樺皮溝行院屯等處東路有爛柴溝陽和灘等處  
土沃而多水草洪武永樂間俱有居民屯種畝收穀  
至二三石後以虜寇犯邊守將自圖遠禍逐民不許

耕佃至今荒棄誠爲可惜夫古今備邊長策莫如屯田此趙充國所以爲漢之良將也臣謂方今宜於諸屯戍所屯步兵隊分伍比於所近沃野開耕作息以時乘閒講武至秋收成官爲歛發而出納之歲會月支足國裕民莫過於此又疏言廼者 勅遣大同鎮守總兵等官會兵出塞諸將旣拘 聖旨且欲要功一時並出無留後者夫雲朔地方廣遠西北兩邊密邇瓦剌旣變詐叵測而兀良哈或潛懷異圖皆不可不爲之備今諸將奉 勅盡行出境萬一爲虜所誘牽制我軍以襲我城則無制之兵誰爲調度此豈萬

全計哉請自今遇征行有 勅調遣諸將宜出戰居  
守各任其責庶有所濟而無所誤 廷議咸是其策  
壬戌拜戶部右侍郎祿二品乙丑以母喪免 上以  
邊計爲重奪情視事因乞終制章再上不允 詔遣  
官諭祭其母而命馳驛奔喪襄事畢卽赴鎮丙寅上  
邊情大事十策於朝朝議從違不決而罷己巳秋虜  
果大入 朝廷乃命西寧侯宋瑛往撫師督戰不利  
諸將或死或遁惟固以居守獨完旣而 車駕親征  
幸大同駐蹕三日振旅固得見而不得言及北狩復  
幸大同與廣寧伯劉安率衆出城朝見 上命括官

庫金帛以犒虜酋或難之固曰主憂臣辱主辱臣死古之義也 主上有急可顧身爲他謀耶且武庫物皆 朝廷所有豈人臣所得專天祐 聖躬倘可以權道餌虜脫吾君於難雖不命猶將爲之矧命之及乎請奉 詔設有罪當坐不以累諸君衆乃從之卽盡出所有以獻而具聞於朝景泰初大臣掌利權者奏請下吏較勘有無欺隱欲因以中之固不爲動吏亦不竟久乃白其年冬以城守勞進右都御史乃上言自虜變以來臣欽承 上命伴守孤城晝夜營營惟圖殺賊以雪國耻今具拙策不敢望其必行伏乞

聖明謀以碩畫擇其可否其策文多不載辛未以却  
虜功轉左都御史尋赴闕議事因上章乞致仕從  
之賜錦衣一襲歸會英宗復位以璽書趣召入覲  
上延見便殿褒諭再三卽日拜戶部尚書賜以白金  
綵緞奇南香帶金織雲鶴襲衣上每宸遊嘉宴輒  
召以從亦時偕遊西苑數有珍異之賜三年以衰老  
自陳乞骸骨陞辭賜鈔賜宴公卿祖餞於都門人咸  
以疏傳方之憲宗嗣位進從一品階榮祿大夫至  
是以疾終年八十一所著有耐翁稿若干卷奏議錄  
若干卷藏於官爲人魁梧倜儻器宏識遠度量恢廓

多籌略善議論歷事五朝游陞華要身在邊鎮者二十載前後所承璽書三百餘函而所上章奏不下數百居常不以武衛廢文教修文廟建經閣興學育才孳孳罔怠至於臨危處變拯敗救債卒完成鎮以固邊防及其晚歲起自休閑入主國計精力未衰鉅眷方盛而深惟止足之戒引年而歸亦庶幾完名全節云

施禮

施禮字仲節丹徒人身長廣額自幼才識過人孝親友兄鄉黨稱之名聞上官卽選爲邑庠弟子原讀書

爲文不煩師資制行尤迥出流輩未幾以詩經領鄉  
薦洪武丁丑登進士第歷行人司副河南叅議以方  
正寡合罷免尋起任淮安府知府復以註誤被謫所  
居岑寂行橐蕭然略無怨懟意衣食惟資僮僕耕種  
一貧如洗優游自得若忘羈旅者永樂三年被召回  
京除山東道監察御史九載陞大理寺丞尋遷少卿  
至署行在刑部事陞行在刑部右侍郎九載陞刑部  
尚書平恕之心益堅冰蘖之操愈勵措履方正性度  
寬平斷獄剖決如流未有不得其理者爲御史時嘗  
曰吾於此職不敢以訐爲直以察爲明惟就事論事



識者已謂有大臣體自是敷歷中外經事四朝始終  
一致一動一靜鮮不由禮於以保完正氣有不可一  
言一事盡其爲人者訃聞上卽遣官諭祭每言天  
不福朕失吾臯陶也勅賜修墳立碑以表異之

虞謙

虞謙字伯益金壇人也洪武乙亥由太學生擢刑部  
山東司郎中陞杭州知府永樂初召爲大理寺左少  
卿尋陞左副都御史命巡視淮揚旱災至則疏民所  
苦請發廩賑貸官爲贖還所賣男女爲奴婢者復命  
督兩浙蘇松諸郡運賦建議以丁糧多寡准運之遠

近著爲定則巡撫浙江察廉糾貪上言十數事多見施行 仁宗卽位擢爲大理卿先是都察院論誑騙罪准洪武榜例梟首謙言比奉詔書自今准律斷罪誑騙在律當杖而流梟首非詔書意 上曰虞謙言是天津衛倉災焚糧數十萬石御史廉視還言主典者盜用多故縱火以自蓋追逮幾八百人不勝拷掠皆誣服論死者百餘人謙察其冤白于 上得減論凡法司及四方所上獄皆親閱之必求其平大辟尤致慎焉詔求直言謙上七事其一論用人曰得人則治興非人則治隳人主之職在擇人而已其二論學

校曰教育之本在師範不惟其備惟其人三曰都察院耳目綱紀之職用以激揚清濁者也今專使治獄非設官本意四曰廣蓄今國用空乏宜預爲備五曰北京八府之民困於養馬宜分給無馬郡縣以蘇圻內六曰鈔法不通由於出多而入少今宜多方收之而不輕出民艱於得鈔則自流通七曰京師多盜由于軍民雜處官司不便約束今宜勅五城兵馬司立甲伍之法無分軍民使互相覺察一家有犯十家連坐能捕首者免其罪皆切中時弊謙儀觀甚偉瀟灑絕俗工詩所著有玉雪齋稿

譚廣

譚廣字仲宏丹徒人也父諱添四當太祖高皇帝起義濠梁居戎籍從征克金壇常州江陰明州等郡遂留禦明州收捕蘭秀山以終時廣年十四補父籍繼被選入補驍騎衛後調府軍爲伍長帶刀宿衛誥授昭信校尉燕山中護衛百戶從征乃兒不花轉燕山左護衛又征驢駒河黑松林朶顏山等處已而從太宗奉天征計上知廣驍勇有謀命率百騎伺敵涿州廣生捕陳榮等三十人輒械以聞上益親信隨戰敗齊尚書兵又戰白溝真定來河功陞指揮使

又戰敗都督韓觀兵陞大寧都指揮再從征胡先鋒  
破賊陞都督鎮守宣府正統六年捕虜獲胡馬中律  
封永寧伯食祿一千二百石錫以誥券九年 上憫  
其老不欲重勞以事命武定侯郭公往代其任驛召  
還未幾而薨爲人長身玉立膂力絕人平生百有餘  
戰戰必勝然未嘗妄殺愛人下士恒恐不及士卒勤  
勩不啻在己寒爲之衣饑爲之食故去也人慕之其  
薨也人哭之咸盡哀初所統神機兵鮮明晃耀進止  
有度望見皆曰此譚家馬 上有所指揮亦曰譚家  
馬至胡虜相戒亦曰慎毋犯譚家馬迨今猶以爲號

所得祿賜一不以私嘗出爲學舍浮屠老子官之用  
薨之明年子亨爲指揮使

盛祥

盛祥丹徒人永樂中登進士官泉州照磨當道交薦  
遷知道州以儒雅飭吏事操介凜然州有虎患禱於  
鼻亭翼日二虎渡河一虎斃於祠下未幾卒于官百  
姓稿素哭拜合祀于寇萊公祠

王振

王振金壇人永樂中舉孝廉授監察御史巡按交趾  
選賢舉能罷其貪墨不職者數十人卓有風槩凡一

十三年民夷信服清廉之節終始如一改知溫州府  
未幾致政而歸不挾官中一物蕭然如寒士焉

胡清

胡清丹徒人永樂中舉鄉貢任清平縣訓導超拜禮  
科都給事中遇事敢言不避權貴侃侃之節見者凜  
栗遷浙江叅政時島夷煽虐於東甌清督兵拒之盡  
殲于海洋事聞賜以綺幣子信舉正統間進士嘗知  
鶴慶府卓有政聲

儲懋

儲懋字世績丹陽縣人由訓導擢吏科給事中正統

改元命充經筵講官懋儀觀魁偉音語明暢講解稱  
旨尋陞翰林修撰與修 宣宗實錄書成進侍講有  
白金綵幣之賚遂拜戶部左侍郎時福建用兵命懋  
主糧餉得便宜行事懋至諭有司毋急歛困民因令  
豪右出粟以助官軍用不乏景泰元年調禮部右侍  
郎踰年母卒詔起復視事尋陞南京戶部尚書時已  
病不能朝尋卒訃聞命有司諭祭治塋

段敏

段敏金壇人天順丁丑進士累官浙江叅議值峴賊  
倡亂所在抄掠民苦於屠虐積歲未平敏至多設疑



兵以誤之間道提精銳直搗其巢穴斬獲無算眾皆散解渠魁殲焉會江西起大獄詔敏勘覈敏當積瘁之後復兼程以進得疾遂卒敏居官廉謹一介必嚴馭歷中外幾三十年家無中人之產

費閭

費閭字廷言號補菴丹徒人成化五年禮部試第一第進士選爲翰林院庶吉士授編修同考禮部與經筵陞國子司業秩滿陞春坊左諭德仍管司業事未幾陞祭酒弘治元年孝廟初開經筵簡充講官車駕視學賜坐講彝倫堂及直日講遂改少詹事兼

侍讀同修 憲廟實錄成進詹事兼侍讀學士再越  
月擢禮部右侍郎病滿三月例停俸 詔特不允弘  
治六年六月卒年五十有八遣官祭葬如制閭長身  
偉貌論議疊疊臨事通變慷慨且恭謹自持人恒以  
公輔期之其在國學最久士子多所造就爲詩文清  
健有則所著有自考詒笑補菴諸集性儉而能達尋  
常雖故紙敝帛必適於用病未久棺衾卽令預製以  
故雖歿於暑月得無後憾云

丁 幾

丁幾字玉夫鎮江丹徒人父元吉學行高古隱居教

授學者稱爲易洞先生璣幼服廷訓嶷然早悟弱冠  
舉進士授中書舍人同官烏傷王君長逾倍尊事之  
吳文定寬與爲忘年交成化末以星變應 詔䟽治  
道本末時政得失反覆數千言而根極於正心諸教  
東宮振紀綱正風俗慎用人重名器蘇民困理財節  
兵皆切時政未言方士釋老近之則害治宜斥遠䟽  
入爲羣姦側目以同官公過連逮出爲普安州判官  
普安遠夷去中州萬里非人所居璣獨從一僕怡然  
行泰如也弘治初三原王公恕爲太宰雅重璣延見  
坐語者竟日明日復召不赴奏記言今日無急於正

君然非一人一日之力宜早堅  主上嚮道之志  
進賢之路庶本正源清制治保邦之務可次第而舉  
太宰韙其言欲引爲吏部竟爲忌者所沮轉廣西通  
判猾伍以怨誣鄰民爲盜斷其舌斃之獄汚鬻其妻  
女逮伏法同官坐事者處之曲有恩至丐印易牒執  
不可曰某平生惟辨此一片心事君敢爲欺耶內服  
闕倪文毅掌銓卽家起儀制郎尋以副使提學廣東  
入賀道清遠山水暴發而沒翌日得其屍衣冠端整  
如生存璣充養深粹居圓運方身不踰中人而任道  
好古崇正闢邪有萬夫直前之勇羣吠衆譟不震不

疎有百煉之剛以儀禮周公之典久廢不行家居冠  
婚喪葬一取衷之其教人正容端坐澄心定氣使躁  
釋慮消方與開講其析疑義入毫芒而文主雅純其  
爲政先風化而一以誠意將之有去後思室廬不庇  
風雨子女踰期無力爲嫁娶而愛君憂國一出天性  
蓋儒學不傳得其門者或寡璣窮探力索深融冲粹  
志之所向不息不岐一以考亭諸子自期待魯齋臨  
川而下不屑也所著大學疑義中庸語孟說及儀禮  
注未脫藁大學士靳貴從受學尊事之終身稱其中  
行獨復於衆醉羣污之中任道甚力制行甚方涵養

甚粹德性甚良如金剛玉潤云

靳 貴

靳貴字充道丹徒人也弘治己酉鄉試第一庚戌會試第二廷試第三授編修歷少師戶部尚書華蓋殿大學士贈太傅謚文僖貴素靜重簡默不輕爲臧否對客論事恒不盡其辭人或以爲過慎比居密勿侃侃正言略無避忌事關宗社同事有所論諫從吏甚力家居率從簡約作師儉堂以示子孫蓋亦休休有容之大臣也而其敷對之詞與應酬之文俱多純正典雅蓋亦與其人相似云有集若干卷藏於家

卻永

卻永字世延別號龍泉高皇帝起鳳陽諱聚者仗劍從之以死勤事晉指揮使調金山衛遂家焉永生十歲失怙然警敏有大志稍長游庠校讀孫吳兵書弘治壬戌任行伍遇賊輒奮勇獻馘晉僉都指揮乙丑賊寇虞嶺官軍困七日夜永出奇解圍當道交薦聲稱煜煜焉正德己巳晉都指揮同知擢陽和獨石叅戎尋轉遊擊將軍辛未京輔盜興民鮮寧宇永感憤敵愾靡出弗摧斬獲二千降散數萬凡追回掠物給主無王者給之軍士秋毫不已私焉過郡邑搜閱

志圖務稔知夷險俾從事弗迷初永受命止燕幽齊  
魯及賊南將兵躡之昕夕戰不休或有客謂守界以  
需功成永曰賊騎深入如病切心腹除惡不務本吾  
其階厲矣人臣在征戰義得專安可襲常故也追至  
鎮江擒元愍殪餘醜而大難卒襄捷上 上嘉悅褒  
之璽書錫之金幣擢都督僉事屯鎮河間甲戌佩征  
西前將軍印鎮上谷逾三月虜侵寧夏孔棘移往鎮  
之旌旗所至倏爾改觀華夷懽服丁丑吐番忠順王  
入寇 上命佩平虜將軍印督三秦兵剿撫之乃多  
出文告布于邊徼云茲役討不庭也今已誓番漢兵



百萬衆某將可某地某地可某師母怯母貪母虐母  
縱罔克有勲母貸義正詞嚴聲赫靈濯虜謀知祈哀  
入貢焉旣振旅旋廷臣列䟽上擢左軍都督府左都  
督云巳卯再受命開府三關逆彬忌之中以事繫於  
理賴汪給事中抹章獲免焉巳佩征虜將軍印鎮遼  
左時開原封守廢會撫監城之相與提兵境上防護  
一日旣結寨時將晡占象察形以移壘言撫監不可  
再言之竟遷一舍許無何暴雨如注舊寨水盈丈撫  
監遜謝之癸未賊以二十萬入寇衆懼謂賊衆我寡  
勢不相格永徧喻諸將堅壁遏衝躬帥精騎往敵之

沉謀英識懸合妙中計斬四十首輜重無算捷奏

上降勅褒賚焉丙戌以疾懇辭方就閒廷臣更薦之  
再佩鎮朔將軍印鎮上谷扶疾出塞戊子疾轉劇累  
辭 俞允三月甫痊卽起僉左軍都督癸巳賊逼三  
晉羽檄日馳復佩平虜將軍印總制宣大偏保虜宵  
走會雲中師奸紀偕少司馬劉公源清往問罪焉謀  
殄渠魁罔治脅從審機用間懸賞待勲地方寧輯事  
竣歸里癸卯再佩鎮朔將軍印鎮上谷永自惟虜頻  
年輕我宜示之以強乃毀垣許入賊疑懼無犯越歲  
始糾衆寇渡口復躬擐甲冑指揮將佐斬首五十賊

氣索然 上聞復勞賞年且暮尚不自倦於勤也如此塞垣未飭烈懷憂悵用特糗糧平版幹議遠邇揣厚薄不愆於素屹成巖險乙巳數上章以老辭歸三載病彌篤進二子訣曰而父官六十年受簡書三十縉紳薦䟽六十戰大小百有奇能識而父言毋忘而父有子矣言畢目瞑 上聞之震悼遣官諭祭議謚隱懷

王 臬

王臬字汝陳金壇人正德丁卯鄉舉丁丑進士初授兵部主事諫 武宗南巡忤 旨詔賜廷杖以外艱

歸服闋仍除兵部以母老乞南曹一職以便親改南京戶部尋改南京吏部考功司主事晉稽勲司郎中出知東昌府以母老陳情乞便養改寧波仕至山東按察司巡海副使東昌土曠人稀召人開闢編戶有土民遷民之異田稅多寡初無定則而豪猾因得以上下其手富者種無糧之地貧者納無地之糧梟因民具奏奉 命丈量梟生長南方洞知量田之弊全由委任不得其人選于所屬得知縣張四維等分任其事而躬親按校之周一州七縣未嘗費公私一緡而宿弊頓清均田之後復稽其地之荒熟以均科徭

逃移者聞風復業身率諸屬存恤安插仍爲之處給牛種禁州縣科歛之不時者又本府夫役率爲市猾包攬一身常兼數役空名影射姦弊百端臬至令各州縣於應該役一半徵銀一半走遞聽民自便不得抑勒遇有使客往來先儘見在人夫差撥如有不敷給銀顧募嘉靖七年冬會計一年之間存省夫銀三千八百餘兩八年新審均徭具申巡撫每夫減銀二兩有奇河下接遞出給印信長單夫有定數過客不得多索夫役不得脫逃問菴馬公以舊巡臺經過縣官送夫頗溢常數馬公輒發還曰以成賢太守之美

臬自蒞任以來清簡牧愛士民歸心惟過往士夫間  
有不樂者大要接見踈簡及人夫接迎不滿其意耳  
未幾解任而歸臬真率坦易於事未嘗苟同平生不  
欺人一語坐無箕踞行無左右顧遇意所不可若嚴  
厲不可犯而度量寬洪能容人之所不能容終嘉靖  
癸丑年七十有七

### 唐 侃

唐侃字庭直號嘿菴丹徒人正德癸酉舉於鄉久之  
選爲永豐知縣遷武定州知州已而擢南京刑部員  
外郎轉郎中自束髮至蓋棺未嘗一日不兢兢砥厲

名檢然於廉耻大閑則若生而成之年二十獨居所  
讀書處夜有奔者峻拒之明旦遂移其處終不以其  
故語人爲孝廉卒業國學偶出游得巨商所遺金不  
啟囊而還之其於貨利聲色能蘄然不汙若此平生  
尤以忠孝氣節自許諸生時父被繫上書請代弗得  
乃藉草地寢夏不帷冬不被如是者竟一年父寃白  
始止居常清苦自刻及爲州縣未常以妻孥自隨數  
千里外獨與一二垢衣村僕相朝夕而飯蔬羹豆榻  
茅以居有寒士所絕不堪者其任永豐武定永豐爲  
江西刁訟邑而武定爲山東悍州侃素愷弟長厚務

掩人瑕爲吏尤欲以教化先之不忍以敲朴苛細爲能故所設科條始若迂濶久之真誠溢出吏民至不忍欺紿遂以辯治稱俗尙鬼有嶽神祠居人奔走雜男女香火無空日又喜爲優閭里浸淫耽於欲而匱於財侃曰此大蠹也立痛革之植二木牌於庭左曰從刑右曰從化願就理者左願和者右久之多立於右以求解言當於理雖賤吏必改容謝之其無理雖權勢人百方爲請毫不假貸以是告訐請託之俗爲之一變其在武定則尤以鎮靜拊綏疲人嘉靖戊戌章聖梓宮往承天道山東諸奄橫索百端奴叱諸尊



官鞭撻州縣諸同事者皆懼逃去侃獨以身當之先是命從者舁一空棺密置旁舍中及諸人索錢急佯謂曰吾與若詣錢所受錢乃引之旁舍中指棺示之曰吾已辦死具矣錢終不可得也諸人乃稍稍引去事遂以辦始上官哀民間財甚鉅侃曰以半往足矣至是所需又不及其半而以餘還之公帑諸逃者皆被劾逮罪而侃乃受旌侃居常怡愉簡默溫然不見臧否其爲吏尤惻惻至其臨利害則鋒鏑凜然敏銳集事絕出於精悍吏所不及者朝覲考滿入京師率空橐以行以是著節亦以是淹滯於世稍遷刑部主

事員外郎然在郡縣久人情吏事益練習居刑曹尤以執法得情著聞卒於官年五十有九貧不能殮部尚書而下咸賻贈之始克歸葬

呂高

呂高字山甫號江峯丹徒人嘉靖己丑進士選授戶部主事劄管太倉時中監尚未盡革事多齟齬高以清肅蒞之弊端翦而公法不廢暇則與余繼甫相唱和詩文日有長益改淮南監視常盈倉事閒肆力讀書文名由此日起調轉兵部武選司主事值大同戍卒稱亂勅往遼陽募兵再陞車駕司郎中驛傳積

弊不可勝計又勢要求索難支乃榜其事於驛門卽  
權力者不爲忌未久 聖駕南幸張方山行慶以都  
御史被逮浚川王公廷相帶管清道刊布告示題覆  
奏章正車駕司事也日夜行百餘里倘事體未熟才  
思稍鈍者卽時獲譴况往返六千里閱歷六十日耶  
浚川初猶閱稿後則惟閱 旨意而已及抵京欣然  
稱讚不絕口陞山東提學副使至則行政有要取士  
無失士有卓異者拔入湖南書院親自督課講明正  
學務得真才兩次鄉試中式者多優等署臬司印數  
月雖瑣務且及重大事無不結絕者吏畏民服積年

訟牒一訊立得其情負冤抑者咸願赴藩司之門不  
矣會相嵩深啣葉御史摘試錄中辭似涉譏訕者以  
聞上大怒械致御史并藩臬之有職事者繫之獄  
罪謫有差而御史竟死杖下臺中以爲高從吏之也  
竟被察典以歸歸則日與錢少叅亮輩酌酒賦詩徧  
遊金焦諸名勝不但與世無求亦自忘其曾爲官也  
十餘年極盡林泉之樂偶感寒疾汗下不快不數日  
遽卒年止五十有二所著有湖南訓規三城錄并江  
峯漫稿若干卷

王 燁

王燁字韞孟世爲金壇人自少讀書卽以古人自程  
度刻苦勵行舉南畿鄉試第二嘉靖乙未進士爲吉  
安推官治獄明恕以禮義勸導爭者皆悅服而去秩  
滿遷給事留省風采凝重雖同官亦畏憚之數言事  
皆剴直嘉靖中相嵩竊柄張威福燁疏論嵩并及其  
子世蕃時嵩之姦未著而世蕃之惡人亦未盡知燁  
在吉安蓋得之先見而中其隱曲故嵩尤恨之未有  
以發敘遷山東武定兵備僉事以任滿赴部踰限奪  
職舊格所無出嵩旨也遂著爲例燁在山東嘗麗御  
史行部而副使吳龍道病乃入謁御史曰吳副使病

甚危不可委之下人非某往視不可遂辭御史而行  
至今東藩之僚猶道之而服其義焉歸里未久竟以  
疾卒仕宦有年貲產不增於寒素時婚嫁葺廬多稱  
貸於人病時蕭然一榻布被蔽體邑令因問疾見而  
深嗟重之臨終語人曰聖賢無自是之學問古今無  
自用之豪傑同邑范楷子正親喪三年不入妻室禮  
敬之終身唐治慙直負氣常下之讀書之室曰樗菴  
有樗菴集若干卷行於世

王樵

王樵號方麓金壇人舉嘉靖丙午鄉試明年遂成進

士授行人丁母憂歸癸丑起補原職遷刑部主事已  
父憂服除遷員外郎數以執法與分宜抵牾而給諫  
吳時來論列分宜罪狀謂樵與其謀出之東兗遂引  
病乞歸徐文貞李文定相繼登軸素相善而堅卧不  
起者垂十四年江陵初輔政搜討名實之士以浙憲  
副起用尋入爲尚寶卿江陵自負推轂功而樵殊落  
落無附麗意又以御史劉臺疏薦樵而劾江陵大咥  
之樵竟以星變自陳歸矣江陵敗起太僕少卿累官  
光祿大理卿刑部侍郎擢南京右都御史樵爲人恬  
默靜慎所至以寬簡稱然使人不敢以私干而豪

右重犯法講習國家吏事旁達洞解而不肯驚於局  
外若世人插標樹羽沾沾徇名之爲者其爲刑部郎  
治律如儒生治經字比勾櫛貫串折衷有手纂讀律  
私箋嘗嘆曰士大夫專以留心案牘爲俗吏文墨詩  
酒爲風雅夫飽喫官飯受成吏胥而謂之風雅可乎  
肅宗末年多有所誅震縱舍以示不測而分宜時借  
以行其私宣大總督楊順嘗殺沈鍊以結分宜後以  
邊事論紕法當斬分宜欲貰之樵力請於尚書鄭公  
宜以去就爭平論死其巡東兗也會景王之國道出  
部內舟千艘役夫二萬樵言派鄉夫則擾民一用顧



募應募者皆沿河積猾縷跣而行自平原至沙河二  
千里半月出境當是時閹狡縱橫至繫縛郡邑長吏  
以徇獨山東不及於譁爲浙西分巡職兼治兵而西  
吳故鹽盜藪樵練士厲兵嚴保伍之法捕治劇賊潘  
榜等又兼得其宿豪名猾罪遣之又督調諸將戰覆  
四倭艦於徐州洋捷聞贈秩賜金其歷法曹也治城  
日書猶故爲郎時曰人命至重彼以一縷懸吾筆端  
而敢不盡心乎哉嘗一當熱審兩慮重辟雖死者亦  
心服而去及解任以歸徒步里中與後進敵禮與負  
擔讓道浣衣脫粟樸遯如野僧寒士甬田僅四頃家

無長物未嘗以貧介念御子弟以慈勝然意所不可少見顏色甚於市撻待人坦率無機絕不爲崔峻福截之行然與之周旋能使誕者訥而放者斂杜門却掃郡大夫有終任不識面者其造請詣見蘄蘄如也故論者以爲今時之古人云所著有周易私錄尚書日記詩考周官私錄春秋輯傳四書紹聞篇行於世

### 王宗茂

王宗茂字時育鎮江人登嘉靖丁未進士初授行人晉廣東道御史時嵩方貴幸以其子世蕃恫喝百司挾其賄巨萬虜闖入至都門外而相嵩賄益甚乃郎

中學詩御史錦以後先論嵩逮褫職宗茂上書撻嵩  
誤國負主八大罪罪皆有指是時 上不能無動而  
外難相嵩顧召當制大臣諭且薄其罪得爲溫之平  
陽丞自宗茂謫而相嵩益盛諸論嵩父子而逮者非  
死則亦戍禍加慘宗茂之丞平陽務爲精勤稱職不  
少見遷人態而其所辨誣良民爲島寇導者三十餘  
人又厲禁其棄女者俄丁母憂歸是時父布政公橋  
亦以嵩故罷歸晨暮夔夔奉食不敢以毀容見也退  
而哽咽幾絕者數四布政公老且病時時雜他懼以  
薦久之布政公亦竟不起茂自是摧毀無復意人間

矣天子尋用御史言斥相嵩戍其子而宗茂竟以哀  
憤積疾卒相嵩罷與子戍卽其卒之日而茂竟不及  
知也當屬纊語不及私唯曰 上活我無以報 上  
恩嬭孺人前泣請訣正色曰某卽不肖而終見女子  
手耶手揮扇自若頃之目遂瞑至 穆宗初下制褒  
贈光祿寺少卿少卿五品法不得予葬祭 特恩授  
之復賜謚錄一子春秋祠祀勿絕宗茂貌寢善談笑  
與人處爽朗無他腸所爲詩文援筆立就善騎射於  
書靡所不窺然畧知其指弗肯竟舉於鄉凡五上春  
官輒不利矻矻不少阻最後成進士爲行人使魯晉

二國却其餽御史南京僅三月丞平陽倍之人呼爲  
青天王於其行泣而送者溢道路布政公素嚴難事  
年五十餘猶宛然孺慕也卒於嘉靖壬戌春秋五十  
有二

姜 寶

姜寶字廷善丹陽人同兄寀力學及遊荆川唐先生  
之門所聞益進荆川深期許之嘉靖癸丑會試第二  
人選入翰林爲庶吉士丁母憂歸服闋除編修時嚴  
相當國趨附之人昕夕如市廷善獨與同志數人約  
不時會聚相見各以身心世務相講求切磋期於

不負此日權門惡之出爲四川提學僉事轉河南叅議陞福建提學副使其兩任提學敦尚行誼崇雅黜浮士風文體皆爲之一變在河南處伊庶人事潛消不逞洛人賴之陞南太常少卿改右通政尋轉國子祭酒申飭監規建復積分之法欲不失國初養士之意期有實用會高相素嫌廷善至是因其駁查魏國家奴事遂中以危法聽勘家居十餘年始得白薦起南太常卿刑部右侍郎改吏部陞刑部尚書改禮部皆在南京以二品考滿贈蔭子皆如制尋引年乞骸骨詔加太子少保致仕家居置義田立義學申宗

法以統理族人年八十以壽終

張祥鸞

張祥鸞字道卿號虛庵金壇人也性沈靜喜讀書停蓄妙思秘不輕發發必得意弱冠舉於鄉益求四方名士與之遊用是學益進而文益高嘉靖己未舉進士爲戶曹郎十餘年前後老於曹事者皆服其詳練至於文學蘊藉尤爲一時名流所推典滇之大郡郡在會城凡一方夷情邊備及事之難決者部使者必以屬之又勲臣之世守其地者以罪逮嗾其下上下下洵洵爲處之咸鎮靜有體遂以帖然中外倚仗甚重

方謂旦夕且柄用而遽請告以歸其歸也以直一寃  
獄忤當路意人共爲稱屈而祥爲絕口不談或謂進  
退之際尚可徐處不宜過於引決亦惟怡然引謝而  
已蓋其雅志恬退初不因事感觸而輕於長往也歸  
來惟蒔花種木去家數里爲別業讀書其間足跡罕  
入城市其詩有陶阮之欣適兼徐庾之溜亮師頤維  
之風格撫陳杜之高華文藻而不浮密而有緻連貫  
則尺幅於丘明騁頓則鑪錘於遷固乃其學業之工  
悉鏤腑匠心尤爲士子所珍云

王堯封



王堯封字爾祝號華崗金壇人早歲爲諸生擅雋聲  
爲文語必驚人不極其意之所到不止萬曆癸未試  
南宮第三初授戶部主事條奏足儲之實四恤漕之  
實四救荒之實五得旨著爲令出守南昌府左遷許  
州同知先是爲戶部方議開納堯封以開納弊竇惟  
銓曹效勞官吏爲多欲大爲汰革銓司銜之故中以  
京察已丁母憂服闋補貳陳州復宓羲之陵於侵蝕  
脩郡邑之乘于漫漶已亥擢守滄州時礦稅繁興中  
使旁午加意調劑民用不擾又編審丁戶減舊額幾  
半歲大稔奉 欽發賑濟躬勤料理人沾實惠長興

丞白某部運過滄挾功司郎勢而橫攬賄爲郡猾居  
間乃暴之章白伏辜去復以事謫兖州別駕擢南刑  
部主事繙閱爰書平反甚衆卽勲貴無所假借轉南  
戶部郎中時曹多虛員兼攝諸司事文案填委應之  
如流水督倉理鹽種種稱善獨強項勁骨屢挫不回  
遇事輒發三吳治兵使者有賢聲入臺抨中因對衆  
面折抨者之謬其人不堪並訐於朝當事者爲先後  
出兩人補外而堯封得黔之思南歎曰身自吾有之  
安能以垂暮之年行萬里途耶疏請以原官致仕歸  
歸則解經刺義爲詩酒社眺聽山川吟嘯日月以爲

樂嘗曰吾家世淳茂勿習於澆世清貧勿浣於利世  
誦讀勿惰于嬉令鄉里稱爲清白吏子孫足矣所著  
有學惠齋稿藏於家

潘自新

潘自新字汝明號用吾家丹徒之太沙沙四面受長  
江而新舍其間若秦風所謂伊人宛在水中央者也  
世耕沙中污邪田伐荻緯蕭至新始就傳受學年三  
十補潤庠弟子而氣恒矯矯若耻以身浮沉閭里間  
性峭直人有過必面折之人卒諒其無他腸也尋亦  
悟已非是輒佩韋寓警一日有稱東海王心齋先生

用布衣起海濱心獨怍怍動謂聖賢爲必可學聞從  
鄉之儒先論道德性命之旨起居飲食家庭間一稟  
於先民程法而鄉之長老相聚笑者曰唉潘孺子之  
爲人也何爲是拘拘者孺子欲衣堯服而操堯行耶  
非也若今之所稱聖人傑士者必掇上第取巍科上  
耀父母次華妻子美宮室而富田園赫赫于鄉里者  
真聖人傑士也孺子何不此之務張汝弓挾汝矢以  
射當世之顯貴而乃爲此妄庸腐儒之士可笑者也  
聞之重唯唯謝教而中實傲睨之新天性至孝友事  
父東園翁每竭力色養而待弟又新爲最友愛一日

東園翁從沙中涉江望郡城中流遭風逆舟覆時居  
維揚領生徒說詩至欲報之德昊天罔極忽涕泗漉  
淫曰異哉何祥乎少頃家人傳翁變遂徒跣走六十  
里抵江濱大號五日夜曰天乎地乎神耶鬼耶我思  
夫使我至此極者而不可得也於是感諸文學錢應  
昌談自新等具言郡守下合屬延江舟子操舫上下  
百里大索風濤又十日夜所獲江中金鐵及腐肉朽  
骨無算而翁卒屬之茫茫不可問矣是時新兩脛沒  
沙泥中幾敗不支友人慰之曰無以爲也而翁之不  
免於水命也且君欲讐陽侯而訟大江之神乎俱死

無益也所爲君慮者上有垂白之母下有藐諸孤在也聞之愈益泣而弟與子掖而歸卧苦塊問具棺以翁生時所嘗服御內棺中立營爲表命曰衣冠之葬自是三年讀禮啜粥食䟽無笑言悅色終其世不入內室豈所謂天性至孝完行端嚴君子非耶

于孔兼

于孔兼字元贊號景素鎮江金壇縣人萬曆庚辰進士授江西九江府推官丙戌陞禮部主事壬辰陞郎中癸巳建言降安吉州判官乙卯卒

人物考卷之三十目錄

南直隸揚州府

蔣宮

徐司馬

朱顯忠

李敬

翟善

石光霽

成璉

李伯昇

潘原明

茅大方

顧成

董璘

高穀

蔣貴

王業

孫安

曹義

許寧

許貴

馬士權

張文

儲瓘

冀綺

高銓

張稷

陳壁

朱訥

黃瓚

顧溥

劉寧

杭雄

仇鉞



本朝京省人物考卷之三十

南直隸揚州府一

蔣 官

蔣宮字伯離真州人三歲喪母哀毀如成人五歲誦孝經論語左氏春秋十歲善屬文表章庸孟之書居父喪勺水不入口毀瘠踰制從學陳子山子山方銳意釋經而宮乃列諸家傳疏得失以進子山異之授以詩書春秋及諸文章大家宮輒悟其旨子山謂人曰明敏若宮雖汝南應世叔不足多也自是博極羣書於制度沿革陰陽曆數之義無所不通元至正初

登第未幾丁祖艱負祖母避地浙東以薦授行樞密院管勾服闋授崇明州判官攝州事有聲丙午 皇朝刻平封畛官乞歸田不許會部使薦官方可備史館授翰林修撰洪武紀元擢開封府蘭陽縣縣丞當南北要衝兵燹之餘寇賊充斥居民存者十二三官廣爲召募一年復業五千戶弭菑捍患掩骼埋胔通商販理冤滯安反側開學校崇德義邑人大和秩滿朝京以疾卒

徐司馬

徐司馬字從政世爲揚州人元季兵亂司馬生九歲

無依 上得之養以爲子既長出入侍左右屢從征伐有功歲癸卯除總制守金華吳元年授金華衛指揮同知洪武元年同曹國公李文忠北征獲故元宗王慶生陞杭州衛指揮使十二月以本衛爲都衛陞都指揮使九年遷河南都指揮使十九年正月入覲陞中軍都督僉事二十五年冬率師征越雋還至成都以疾卒司馬好文學接人溫然謙恭爲政以惠愛爲先所至撫綏士卒拯卹貧困甚得人心尤敬士大夫公事之隙退居一室講論終日蕭然如韋布之士自少富貴家無餘貲人稱其賢云

朱顯忠

朱顯忠如臯人初同兄貞事張士誠我師下松江顯忠兄弟率部下來降吳元年授濠梁衛指揮僉事後從鄧愈下河州抵土番還守河州及從傅友德克交州遂留守之至是世貞誘合番寇數萬來攻顯忠戰却之僞夏趙元帥復與世貞合兵攻城城中食且盡外援不至部下皆曰與其陷死地孰若出城求生路乎顯忠厲聲曰爲將守城城存與存城亡與亡豈有求活將軍耶詰旦世貞攻圍益急顯忠悉兵出東門拒戰而世貞復攻西門日且暮顯忠被傷裹瘡決戰

城破爲亂兵所殺千戶王均諒被執不屈蜀人磔之于文州東門初顯忠領士卒七百餘人及城破僅二百人旣而友德調兵來援世貞棄城遁去事聞使祭顯忠均諒厚恤其家

### 李敬

李敬初名鴻漸江都縣人洪武初年以文學徵改名敬六年授刑部尚書本年致仕十四年三月丙申起敬爲祭酒賜之勅謂所用非人致災異疊見賢才避位故遣行人召之癸丑賜敬鞍馬夏四月命國子生兼讀劉向說苑及律令上諭敬曰士之爲學貴於

知古今窮理聖經賢傳學者所必習若說苑一書劉向之所論次多載前言往行善善惡惡昭然於方冊之間嘗以暇時觀之深有勸戒至於律令載國家法制參酌古今之宜觀之者亦可以遠刑辟可令諸生讀經史之暇兼讀說苑律令必有所益八月丁巳命敬釋奠於先師孔子冬十月免歸

翟善

翟善字敬夫泰興縣人洪武中由歲貢入國子監授吏部文選主事二十年歷本司員外郎二十六年吏部尚書詹徽侍郎傅友文伏誅命善署本部事善於

通鑑稱 上旨特陞吏部侍郎仍署尚書事會 上

以諸司職有崇卑政有大小無方冊以著成法恐後  
之蒞官者罔知職任政事施設之詳乃命善同翰林  
儒臣倣唐六典之制自五府六部都察院以下諸司  
凡有設官分職之類務編爲書名曰諸司職掌詔刻  
行頒布中外五月奏准各衙門吏三年役滿於本衙  
門見缺令史書吏內陞用再役三年給由赴京如有  
餘吏送赴吏部及王府長史司如託故不給由者治  
以罪十月詔祭酒胡季安選監生年三十以上能文  
章者三百四十一人命善除授教諭等官二十八年

實授吏部尚書一日上諭羣臣曰善雖年少宇量宏闊他莫能侔也善明於經濟凡所奏議允合上心上曰朕有良佐何患天下不治上欲命工部爲善營第於泰興善曰江鄉地隘宗親且衆誠不忍奪人以自益也况未報涓埃何敢當此上語羣臣曰有官居鼎鼐無地起樓臺善與寇準同風矣善家成籍上欲免之善曰戍卒宜增豈可以臣破例上曰善可謂社稷臣矣二十九年以事免歸

### 石光霽

石光霽字仲濂泰州人少穎異讀書五行俱下元末



侍讀學士張以寧留滯江淮光霽從之游以寧  
博學善詞尤長於春秋嘗謂後之學春秋者弗據經  
以說經顧任傳以疑經亦惑甚矣故以寧談經每通  
融三傳而兼用之光霽諦聽講解至忘寢食洪武十  
三年以明經舉爲國子學正自常教外四方髦士多  
從之游戶外履恒滿十七年陞受春秋博士作春秋  
鈎玄二十卷以闡明先聖之旨學者競傳習之光霽  
感以寧授受恩義旦夕不忘時以寧沒已久遺藁散  
落光霽遣其子往維揚購得其詩百餘篇捐俸梓行  
之後以寧子炬貢入國學以其文藁示光霽光霽一

見悲喜交集復捐俸梓行焉論者謂弟子篤誼如光  
霽者世所罕見也光霽亦工爲詩每一篇出學者輒  
詠諷若膾炙不厭云

成璉

成璉興化人洪武中由國子生授代州學正教諸生  
有規矩以薦陞蔚州知州爲政清肅蔚臨邊境璉與  
守將協力修邊備民賴以安上起義之初璉率壯  
士來謁賜白金百兩命還守蔚州璉復招邊卒勇敢  
者得二千人以進上嘉之俾典兵餉仍協力守城  
爲勞勩上卽位命爲叅議將大用之而卒遣官

改贈吏部左侍郎賜其家白金五十兩綵幣八表  
裏鈔百六十錠官其長子傑爲行人

### 李伯昇

李伯昇泰州人初與張士誠俱起鹽徒元兵圍高郵  
伯昇與士誠突圍出走士誠據姑蘇以伯昇守湖州  
歲丙午十月徐達帥諸將攻湖州伯昇遂出降上  
命仍其官洪武元年進榮祿大夫中書平章仍兼同  
知詹事院事二年征守陝西三年十一月大行封賞  
賜文綺及帛十六疋上欲優待之命食中書平章  
祿不署事子孫世襲指揮僉事五年命爲征南右副

將軍統兵討靖州五溪等處蠻寇功與江陰侯同上甚嘉之十一年定省臺等官歲祿之數伯昇每歲給七百五十石於官田內給與十三年春命往漳州理軍務未幾遣使齎符召還尋卒於京

### 潘原明

潘原明泰州人初與僞吳張士誠俱起鹽徒元兵圍高郵士誠與原明十八人突圍出走後爲士誠守杭州歲丙午右丞李文忠師至錢塘原明遣員外郎方夔詣軍門納款文忠問之對曰天兵如雷霆當者無不灰粉百萬生民間之莫不震懼及聞將軍神德勞

速如犬弗驚皆曰王者之師也以民情如此天意可知不如乞降令小民有更生之望文忠遣歸明日原明卽以款狀來投凡得兵三萬糧二十一萬馬六百疋上以原明全城歸降民不受戮授行省平章其官屬皆仍守舊職洪武三年旣封功臣上于原明欲優待之命食其祿不署事子孫世襲指揮同知十一年定省臺等官歲祿之數原明每歲給七百五十石于官田內取之十四年大兵平雲南擇名臣重望者鎮其地以原明署布政使司與梅思祖同心撫輯民夷安之十五年卒賜葬鍾山之陽

茅大方

茅大方泰興人自少穎敏工詩文爲宗黨所重父友  
陳堯道寄以詩有計爾生年今二十每懷聰慧舊無  
如陸機此日能爲賦賈誼何時復獻書之句洪武中  
以儒士應辟典教淮南考績入朝 太祖召對稱  
旨擢秦王府右長史 內出制詞褒美且勉以董子  
輔相德業等語賜賚甚渥大方以爲特受隆遇懼無  
以稱益用感激在王左右諫諍規正事事得體踰年  
秦國稱治因大書揭其正堂曰希董以彰 聖訓且  
身其尚友之志建文中累擢右副都御史吏部左侍

邠人靖難師起憤國命日感嘗以詩寄淮南守將梅  
殷慷慨激烈聞者壯之詩曰幽燕消息近如何聞道  
將軍志不磨縱使火龍燔地軸莫教鐵騎過天河關  
中事業蕭丞相塞上功勳馬伏波老我不材無補報  
西風一度一悲歌蓋北兵初起爲鐵鉉等所拒尚未  
渡淮時也太宗臨御坐奸黨不屈與其子順童道  
壽皆戮死永樂四年幼子文生亦受誅

### 顧成

顧成江都人狀貌魁偉膂力絕人洪武初兵臨和州  
成仗劍詣軍門命居幕下數從征有功累陞都督僉

事及靖難兵起軍師縶成至以先朝舊人得釋成感泣歸款後以居守功封鎮遠侯卒追封夏國公謚武毅

董璘

董璘字德文高郵人少穎敏勤學永樂十六年會試第一授翰林編修有時名尋以母老乞歸養一日母病思鰯魚時無鬻者卽詣鎮江禱于神命漁者舉網忽得二鰯以歸鄉里驚異陞修撰與修實錄後憤太常職典禮樂不可畀異流乞以已爲其官遂獲譴歸卒家所著有玉堂清餘集



高穀

高穀字世用興化縣人甫十歲入邑庠卽能奮力於學弱冠遂領鄉薦登永樂乙未進士選庶吉士辛丑授中書舍人甲辰陞左春坊未幾以學行獨優陞翰林院侍講丁外艱服除還行在宣德乙卯主考順天鄉試人服其公正統改元英宗初御經筵少傅楊士奇等上言經筵講官必得學問貫通言行端正者以供其職遂薦穀與苗衷馬愉曹鼐四人專侍講讀賜三品章服穀每進講敷衍詳明聞者嘆服戊午預修宣廟實錄成進侍講學士甲子主考應天鄉試

乙丑進工部右侍郎兼侍講學士入內閣知制誥丁卯進階通議大夫十四年乙巳秋 聖駕北狩命穀留守尋進工部尚書兼翰林院學士時 景帝卽位虜情叵測邊境日嚴選使虜者中書舍人趙榮獨請往迎遂陞大理寺少卿穀加榮之奮忠卽解所束金帶與之景泰元年都御史楊善迎 聖駕自北還議奉迎禮穀欲從厚涉疑未定有千戶龔從榮投書於穀言奉迎當重之意穀卽袖其書以進且曰武夫尚知此禮况儒臣乎陳循見之悲甚穀執議如初已而 聖駕至百官郊迎穀

直上章以伸前議無所顧忌聞者義之辛未朝廷以  
穀望重進少保仍以尚書兼東閣大學士穀上言內  
外諸司惟賢是用况經筵日講關係聖德尤在得人  
遂薦少卿陳詢學士呂原中允楊鼎都御史王文大  
理寺卿蕭惟楨疏上命詢鼎侍經筵文入閣甲戌南  
京災朝廷念 祖宗陵寢所在特命穀往祭祀事竣  
被災者千餘家悉發廩賑之歸奏稱旨是歲冬給事  
中林聰忤執政王文等欲害之乃諷御史劾其私而  
羅織其罪穀獨持正議卒從輕典士論韙之乙亥星  
變疊見上疏自陳宜譴罷以謝天意不允丙子寰宇

通志書成進兼謹身殿大學士是歲秋順天府鄉試翰林院侍讀劉儼爲考官執政陳循王文以子入試不中交章奏儼去取不公欲置於法乞詔翰林及六科十三道覆考穀時以疾不出一聞此事卽強起預考考畢毅然入言曰大臣子與寒士爭進已不可況又不安於命欲殺考官可乎因閱卷止黜林廷一人餘俱從儼所選由是儼得釋穀之名益振而拂其意者銜之穀屢求退避不允天順改元英皇復位首召穀慰諭而留之其餘誅斥殆盡穀卽上疏辭保傅北時機務填委穀亦衰老弗堪懇乞骸骨上憫

其又特允所請賜金幣襲衣給驛舟以歸越四年庚辰以疾卒壽七十贈太保謚文毅天資簡重操履清介視義所在勇於必爲雖違衆不恤也在位論薦尤號得人所著有育齋集八十卷

蔣 貴

蔣貴字大富揚之江都人父從龍以義勇附 太祖起淮甸洪武十一年隸燕山中護衛貴生有大志恒念父功屈人下甫官卽代役三十一年舉義克雄縣攻大寧及敗平安軍於肥河戰靈璧收泗州遂渡江入京師功成論次自千夫長陞至昌國衛指揮同知

後征交趾四征沙漠敗阿魯台子於龍口洪熙元年  
復至大松嶺擒殺賊衆陞都指揮僉事調掌彭城衛  
事宜德二年四川松潘夷叛以貴充右叅將率軍捕  
之首募鄉道從東路險絕處攀緣而進賊驚曰兵從  
天上來邪一日戰十數合以全勝聞賜勅有奪橋斬  
關如古良將之譽明年陞都指揮同知鎮守密雲諸  
關番夷復叛仍充叅將討之尋陞左軍都督僉事充  
副總兵貴謂夷性變詐非長驅撲滅患未可弭乃大  
閱士連破黑虎等四十餘寨斬首千五百級生擒稱  
長人崖死者無算夷遂寧謐 賜勅獎諭陞都督同

總兵官佩平蠻將軍印鎮守其地凡事有利害  
悉奏罷行之就戚州千戶所建州治興儒學使知所  
教列屯而耕堡壘相望使知所守廩庾以足人心大  
安正統改元召還陞右都督時西戎僞王阿台等寇  
甘涼邊將屢失利命佩平虜將軍印率京營五千騎  
征勦凡陝西及甘肅涼州等處官軍悉聽節制兵至  
鎮番出魚兒海子哨還時虜酋把禿孛羅率衆犯莊  
浪貴命將禦之生縛孛羅等百人又諜報阿台屯伏  
河西遂躡踪倍道至亂山奮勇衝入且追且殺至石  
城泉斬首二百餘盡獲其馬駝衣械虜有逃奴來言

阿台府在貴議卽往副將李安沮之貴拔劒厲聲曰  
汝任邊寄肉食且數年坐視其縱橫不制尚掉三寸  
舌以撓我師敢復諫者死乃策馬前馳見賊遂整陣  
而前生擒男婦數十人送營復令軍士疾走至兀魯  
猝見虜衆牧馬遂突衝馬羣以鞭擊箭橐聲驚之馬  
盡佚虜旣失馬皆輓弓步戰卽令衆躍馬揮刀齊入  
以旗牌手督之遂大捷又分爲犄角勢列五百騎爲  
左右翼縱百騎登高峻疑之旣遇賊夾擊戰逾九十  
里阿台亦窘死西土遂寧捷聞遣中官齎綵段白金  
封定西伯食祿千二百石給世襲誥券晉鎮甘



滇凡年召還以雲南麓川宣慰思任發累寇邊六年  
命克總兵官佩平蠻將軍印賜蟒袍銀盔甲以行貴  
與總督兵部尚書王驥至雲南遂遣兵勦之賊勢稍  
却師集金齒分三路進而貴與尚書從中路令上江  
兵夾攻會南風大作縱火四面矢石俱下如雨貴乃  
擐甲鼓勇而前賊大潰斬首十萬餘級江流盡赤移  
屯騰衝賊據木籠山爲連環七寨又驅象爲陣合數  
十萬人於馬鞍山悉破之勢如拉朽直擣巢穴蕩無  
遺氛賊父子僅以身遁凱還詔戶部侍郎王質持羊  
酒迎犒臨清至則上親慰勞遣中官賜金幣羊酒

於家擇日御奉天門設教坊樂部勞平夷功陞定西  
侯賊父子既遁聞被擊於緬甸八年命與尚書下緬  
取賊仍寵賜以行時緬人數報送至而潛以金樓船  
載賊離五十里而不至貴曰此給我也過江則絕我  
歸路且瘴癘將發不乘此而剪之可乎於是誘緬人  
聽賞貴則往焚其舟大戰一晝夜其賊首已先去賊  
子思機發之在孟牙者亦遁去盡俘其妻孥象馬以  
還破其賊寨二百餘處焚夷遂平九年還 上復親  
宴勞加祿二百石賜白金綵段金酒器鞍馬以寵異  
之 子雄見賊去亟率漢達官軍三十人追殺不

賊反阨其後衆寡不敵自刎沉於江時年二十四其三十人亦從之死 上嘉其忠勇贈懷遠將軍彭城衛指揮使十二年瓦剌遣使來朝諜者知脫脫不花及也先候使回卽分兵入寇 上命貴總兵禦之至境嚴耀威武賊引去召還嘉勞甚至十四年正月忽感風疾薨於家享年七十訃聞 上震悼罷朝遣禮部尚書胡濙等諭祭前後十四壇及賜齋糧孝布明器等物進封涇國公謚武勇

### 王業

王業字時泰興化人體貌豐偉明敏多才幹幼從戴

雲朋學書過目卽成誦能盡得其旨業年十六襲父  
職京師適車駕北征例當扈從業在中軍勁循紀律  
而勇略過人同事者皆驚異之曰南人少年能是乎  
旣凱還復任吉安時年雖少而遇事敢爲慷慨無所  
顧避境有急必以屬業梅花洞寇作僉議曰彼恃險  
爲亂攻急則退不與戰緩則肆非業莫能平也往未  
踰月果平之永豐大盤山賊首曾子良聚衆劫殺勢  
甚熾將及於縣縣遣人告急業卽奮然以行曰兵固  
不敢擅調然民患之急如此可坐視乎古有先發後  
隨者我其行矣卽日選精兵二百餘人倍道以行或

諷急業曰彼烏合之衆耳急則計無所出若少緩則得以爲備法固各有所用也猝至逼其營壘賊惶懼出戰一鼓而勝之大盤平事聞陞本所正千戶益精熟武經諸書練習士卒以求報稱旣數年閩浙寇起朝廷遣大將寧陽侯往討之吉安軍當調業統以往從都督劉某禦賊于丁公崖常爲先鋒大軍潰而業之軍獨全常竊嘆曰吾不得自用其知而動輒牽制於人上不能爲朝廷殺賊下不能爲生民除害吾甚負此職矣爲人輕財好義遇賢士大夫傾竭無所惜居家孝友接人恭而有禮其御士卒嚴而有恩驥

駿乎大用而竟齎志以歿年四十有九

### 孫安

孫安高郵州人永樂中代父煥職爲大興左衛指揮僉事歷陞都指揮使正統己巳陞後軍都督僉事總督獨石馬營龍門等處備禦景泰辛未進同知甲戌以疾罷鎮成化七年十一月卒賜祭葬如例己巳之變獨石等城爲虜所攻守備都指揮楊俊等聲言城孤懸難守皆棄歸遂鞠爲荒墟安旣受命總督與協贊軍務山西右叅政葉盛請修復之躬率士卒芟蓬蒿募民廬舍飭戰具弔死問傷流亡復業人有寧宇復

爲城于時議者謂其保境之功居多子驥襲衛指揮僉事

### 曹義

曹義字敬方儀真人父勝指揮僉事義弱冠襲父職扈蹕征虜至會州時太宗方欲肅清沙漠將士非遴選不得從宣德初擢都指揮僉事江西梅花洞賊施州衛刺惹洞蠻憑險竊發義往捕撫咸底靖謐擢中府都督僉事英宗登極充遼東副總兵擊虜于寧遠至白雲山取其輜重璽書賜征虜前將軍印爲正總兵與成國公朱勇會兵兩河口襲虜功尤多陞

都督同知虜犯義州戡之于羊腸河陞右都督正統  
己巳與虜戰遼河摧其前鋒旋師至廣平山東川洲  
虜復踵至廻騎擊破之陞左都督景泰初追虜至梨  
皮峪鷹湖東與叅將胡原分左右翼夾擊幾殲焉巡  
視邊戍至仙露寺虜穿塞垣深入與副將焦禮等設  
伏以待薄暮虜至奮擊大破之前後大小戰無慮數  
十所俘斬虜衆鹵獲雜畜器械輜重無算于是虜畏  
其威名不復敢盜東北邊矣屢賜白金綵幣 英宗  
復位進爵豐潤伯祿一千三百石子孫世襲賜鐵券  
未幾以年益高不欲使居極邊召還入見慰勞甚至



賜酒居京師奉朝請久之以疾卒時天順庚辰  
享年七十有一

許寧

許寧字志道江都縣人正統末襲父職爲羽林左衛  
指揮使以薦陞署都指揮僉事守禦柴溝堡成化初  
充大同遊擊將軍累立戰功陞署都指揮同知六年  
陞都督僉事充總兵官鎮守延綏十八年陞都督同  
知仍充總兵官鎮守大同時虜衆入寇與鏖戰二日  
一夜虜解去降勅獎諭二十年以下米莊之敗降羽  
林左衛指揮同知閑住弘治五年以言者交薦陞署

都指揮使坐營管操未幾卒贈都督僉事寧自束髮  
行陣凡經一百十九戰麾下知名士若劉寧神英李  
杲等十餘人咸爲效力致死故所向克捷性沉毅自  
負不屑進取一時稱邊將者殆莫能過大同之役寧  
知虜勢方熾欲持重以俟動而代王督趨甚急至使  
衆哭於轅門寧憤激以出遂至於敗議者惜之子泰  
試武舉第一

許 貴

許貴字用和江都人父諱成元季戍通州從 高皇  
帝義陞燕山中護衛百戶後從 文皇帝靖難累

謝功賜誥券封永新伯食祿一千石子孫世襲指  
揮使貴十餘歲卽善騎射長精孫吳兵法喜讀儒書  
永樂中襲羽林衛指揮使宣德丁亥總戎以掌衛事  
者不得其人薦貴代之百廢咸舉正統甲子朝廷命  
廷臣舉武職之有謀略善騎射者各一人以禦邊患  
前安卿伯張安以貴應召授都指揮同知調山西行  
都司以擊敗北虜有功陞都指揮使歲庚午奉勅  
充右叅將備大同西路累敗虜于蒲州營及高山陞  
都督僉事是年秋又以破虜功陞都督同知明年以  
疾乞還京師至天順改元疾愈佐理左軍都督事項

之調掌南京左府辛巳冬四川松潘叛驛召赴闕命充副總兵官往守其地會叙州府山都掌夷寇叛尋詔追于路俾先平之而後往松潘貴直搗其巢穴斬首數百級降五十餘寨遂感深箐嵐氣以成疾及振旅西沂僅次成都而卒得年五十有六始疾革呼寧謂曰我死亦慰地下矣又作詩有夷醜掃不盡衷心尚未足之句實忠憤所發云

馬士權

馬士權泰州人讓官於弟寓京師教授博極羣書多識士先生遊劉元博徐有貞輩凡疑必往質士權

故、徐尤厚天順元年石亨曹欽等引有貞共爲南城之計不久權勢相軋遂相誣搆自武功伯降廣東叅政猶慮其復起必欲殺之令人僞造奏本毀謗朝政石曹因譖有貞怨望使親信馬士權爲之上命權倖門達分遣邏卒追有貞於途收士權等下錦衣獄達陳諸惡刑於廷必欲士權承服以及有貞士權遍嘗荼苦幾死者數終無一言使是時若少齟齬有貞禍烈矣七月二十五日以天變得釋有貞出獄感士權許以一女嫁其子以奉湯藥灑泣而別天順四年有貞自金齒歸蘇士權自泰州來謁欲成婚約有

貞頗有難色士權辭曰貧儒不能當侯家女有貞遂從其言而以微物贈之士權略無怏怏意遂歸士權貌甚寢長不踰五尺言論雄偉氣節凜然無一言以及徐真信義士也

### 張文

張文字存簡泰州人天順己卯舉鄉試第一人尋遭父喪悉用朱氏禮一鄉化之成化丙戌登進士第泰州入國朝預科甲自文始筮仕刑部主事壬辰進員外郎郎中文在刑曹最久有所讞必本於公恕他司獄有未具者多移鞫于文旣讞無後言丙申以日

倉生變詔選十三人錄繫囚于天下文分地畿內平  
反誅死者百十有六人雪徒流以下千有四百人其  
辨馬平兒事尤愜人意平兒報父讐殺人抵罪文上  
言君父之讎臣子所必報反覆數百言讀者感動畿  
內人有繪其像而祀之者丁酉大水歲侵復有詔選  
使五人賑恤之文分地兗州規措勸分不遺餘力又  
上疏請分府庫餘資以慰倒懸語益痛切益活饑民  
復流移者無算他如通貨財修祀典申掩骼埋胔之  
令皆自文發之己亥陞浙江按察司副使忝醴商李  
成誣販鹽者爲盜轉引至十九人初訊者以爲實多

疫死獄中存者僅六人覆訊疑之審詰得其情六人者幸不死一省稱快餘平反者尚多在溯踰年大率以洗冤澤物爲已任蓋未竟其所施而以家艱歸矣亡何以疾卒得年五十有七

儲 瓘

儲瓘字靜夫其先毘陵人也宋時徙海陵今遂爲泰州人生而秀穎少攻文辭成化癸卯舉應天鄉試第一甲辰舉會試第一 廷試賜二甲進士第一當是時泰州儲君名動京師矣太宰濟南尹旻欲選爲屬

懇求以養授南京吏部考功主事未幾調考功郎中



嘗以一官得實尚書耿九疇忽又改評瓘不從且云  
公所執何異王介甫兩侍郎方並坐省中九疇大慙  
良久曰我爲渠知己然非我莫能容也後尚書某繼  
耿亦欲有所改評瓘指其官注籍云嫌涉部長鄉里  
遂不改弘治丙辰當黜陟天下官員瓘考如臯令某  
不稱職令囑某太監爲之請瓘宣言於署廳曰某某  
雜職尚能名節自檢有以進士宰邑反不自立且託  
內侍干請亂法語人云方發如臯令干託時吾幾媿  
死曾疏薦丁璣等五人可補諫職之缺科道官龐泮  
等論事下獄爲之申抹人服其敢言丁巳陞太僕少

卿乙丑陞本寺卿蒐訪馬政得失剗革蠹弊修舉所  
當興復者疏四事以聞 詔皆報可又上章請紀注

孝廟言動以示將來正德丁卯擢都察院左僉都  
御史總督南京糧儲首釐正倉庾宿弊條上應議數  
事省糧戶及京邑供給之費戊辰進戶部右侍郎已  
巳轉左庚午春以疾乞休溫 詔答之賜乘傳歸是  
冬召復舊職辭不就壬申春起爲南京戶部左侍郎  
癸酉改南京吏部左侍郎甲戌卒於官瓘有內行事  
親至孝撫從子洵如已出授經學竟以進士顯門人  
卒者多取科第時李夢陽何景明等倡古文辭執

政才嫉才欲擯斥之瓘以文章復古爲國家元氣故  
於李何極其扶植得不傾陷性好學老而彌篤文法  
律森嚴詩冲澹沈蔚有陶韋之風所著有柴墟文集  
駟野集奏疏各若干卷嘉靖癸未禮部以易名請賜  
謚曰文懿

冀 綺

冀綺字汝華寶應人成化己丑進士授戶部主事歷  
員外郎郎中以歲饑賑濟河間諸府稱旨往偏頭關  
督餉有功加俸一級累遷應天府府丞南京太僕寺  
卿應天府府尹嘗陳邊務及捕盜輯民二十餘事頗

見採納已而自陳致仕正德五年卒

高銓

高銓字宗選揚州江都人成化乙酉舉鄉貢己丑登進士第或諷使增年以備臺銓曰某不敢爲欺也授大理寺右評事上疏言時政六事丙申錄囚福建平反至百餘人及會勘大獄不爲私撓擢山東按察司僉事改浙江河南歲饑人相食朝廷遣侍郎一人與銓往賑驗丁口程遠近審緩急務均實惠屬吏爲侵尅雖有所憑附亦按治之流移四集者蒸染爲疫癘青給衣糧亟散遣之其全活多至不可數歸德有

黃河退地千餘頃爲親藩所據州守亦以租員被訟  
於朝命中官及侍郎都御史按其事銓謂租負責之  
州地則民所恃爲業者中官挾以禍福執不變後他  
藩亦以河退地請其官長欲私於長史以其半兩釋  
之銓不可民賴以不病凡一官歷二臬九載四薦乃  
遷浙江副使卽攝司事清案牘勤聽斷羣吏斂手勾  
考戎籍姦慝無所伏壬子擢河南按察使河決張秋  
命官浚治銓以贊畫勞賜白金文綺乙卯歷遷左布  
政使丙辰擢都察院右副都御史巡撫保定諸府兼  
督鴈門諸關定徭役修要害有妄指民田獻爲皇莊

者 命侍郎二人會勘民冤聲撼野至歐州縣吏不  
得行衆頗縱之欲藉以塞命銓曰若是則民重得罪  
請勘實以聞 主上仁明當不忍奪民利以徇左右  
已而果然庚申陞南京工部右侍郎累攝吏戶兵三  
部事癸亥江淮饑復領賑濟所活亦衆陳荒政八事  
多行之進南京右都御史掌院事正德丙寅擢爲南  
京戶部尚書令衛士廩米與折銀每月兼給人甚便  
之丁卯南京吏部及北院相繼告闕兩被召薦會逆  
瑾竊柄與銓相忤特令致仕猶銜之不置逮就詔獄  
文文無所得乃放歸後竟撫他事褫其官庚午詔復

以官致仕中外方冀其再用而以疾卒矣銓慮  
周悉通貫條格每自謂治律之功不減治經凡經史  
以及陰陽祿命堪輿醫藥之類罔不涉獵始號平山  
晚更號貽安老人所著有平山貽安二稿若干卷後  
以例請於朝特贈太子少保賜葬祭

張稷

張稷字世用寶應人少有器識弱冠爲縣學生穎脫  
儕類御史見其文驚曰是當爲場屋魁比試有司屢  
弗利成化戊子始舉鄉貢壬辰登進士第觀政戶部  
嘗預收京儲給河南潼關諸軍賞皆有能聲授太常

博士凡值郊祀廟饗左右執事甚閑禮度有白金文  
綺之賜居數年被簡爲四川道御史監光祿寺出納  
明慎及按福建樹風采嚴號令鋤強植弱敏於聽訟  
立判曲直然未嘗恃以爲能每錄重辟必衷之情法  
所全活者甚衆有藩閩武臣怙勢爲民病列其罪奏  
斥之名益彰尤重文教以作人厲俗爲事間又訪先  
賢遺跡興廢補敝存問其子若孫或吊古感物輒形  
歌詠而未嘗以妨政務及受代簿牘無留者時官數  
多冗至有冒名匿罪以干者別有擬奏而病已作竟  
不果上云稷闔爽明達博交泛愛而臧否自別有不



當志輒見辭色旋亦消釋不復著胸臆間憫窮赴急義氣所激視財利若土其在官十餘年不問生業未嘗增寸土一屋服器儉朴蕭然若諸生時爲詩文清拔有思致至於辨別體裁評隲高下尤介介不苟所著有竹西稿若干卷

陳壁

陳壁字瑞卿高郵州人舉成化壬辰進士授嘉興縣知縣性抗直不折節權貴人凡上司以事臨者與辨析民情利病侃侃不撓終能以氣節服人後因薦擢江西道監察御史益勵風裁不爲委瑣齷齪衷尤坦

直披肺腑論天下事常持大體而臺紀克振久之進  
山東兵備副使分守臨清臨清漕河所經夫役百需  
蠹弊甚一切裁省冗濫有貴璫怙勢搖吻于民難饜  
壁折以法璫恚怒竟莫能奪其他均徭役剔奸宄掖  
良善清武備清源一帶德如父母進本司憲使時郡  
縣吏日爲東濕煩苛之政民不堪命首下令禁之繩  
貪墨甚嚴其倚法爲奸有所侵牟者黜弗貸境內諸  
猾悉斂戢無敢恣者十五年陞南京太僕寺卿馬政  
自兩京並設以來留垌僅列職銜堂宇廊廡日就傾  
圯亟則節縮帑餘重修飭之又建棲雲環山二樓分

臺不累於民而所履躋然會邊鄙不靖兩京歲取備  
用馬萬匹南直隸止三分多准折價以便寄養壁從  
容處分州縣安輯無擾尤與人信不侵爲然諾寮屬  
有過率指摘之亦莫不委情輸素若投醪然踰三載  
陞右副都御史整飭薊州等處邊備兼撫順永二府  
卽奉身勇退以養病歸家性孝友重行誼事伯兄如  
父嘗以御史居家久以微譴受朴無難色人皆高其  
義云

朱 訥

朱訥字存仁寶應人年十三父令坐肆治賈一歲間

市價金品俱不習父怒曰爾日何爲曰第誦書耳父  
曰能日記千言乎歷試之果然聽之以成化丁酉舉  
鄉試屢蹶公車就選得知鄞縣縣一歲中供應費萬  
金郡太守姜昂自訂會籍削其半置于郡庭訥固請  
下籍于縣行之歲終會又省三之一姜曰府怨不避  
是難能也倭夷來貢守臣怪倭久留鄞趨有司牽海  
舶行倭操短兵譟呼出殺牽夫數人訥馳騎入其曹  
語譯者以禍福約三日出關倭乃定增修錢湖七堰  
水不暴田歲以屢稔改治江陵江陵以丁夫車馬爲  
大費訥乃窮詰主者出匿錢萬緡并計每歲費若干

仍其數籍之果有羨者以母憂去旣免喪遂不仕  
日與親故譚名理商榷古事或御小舫往來東谿田  
廬體物賦詩以爲樂嘗謂友人曰文主揚道不限世  
代豈必專師馬遷詩欲近情且兼情豈必止範漢魏  
以上壽終于家子應登進士歷官憲副

### 黃瓚

黃瓚字公獻儀真人自少性簡重不妄言笑不與羣  
兒嬉年十五補邑庠弟子員每宿號舍秉燭讀書率  
至夜分提學御史戴珊深器重之成化庚子舉應天  
府鄉薦甲辰登進士第予告歸省時大母病篤壽已

九十亟喜曰吾及見孫榮於願足矣弘治改元授南京戶部主事督輸稅糧出納唯謹人不敢欺進本部員外郎嘗監收內庫公需宦者致餽食瓚不顧而去以父憂解官居喪一遵於禮外寢三年未嘗入內士夫難之服闋遷本部郎中供職益勤久之擢四川布政司右叅議督理松藩糧儲祛宿弊足軍餉藩賴以寧尋丁母憂除服轉本司左叅議時鄆藍諸盜起西蜀騷動都御史林公俊雅重瓚檄董戎馬深入通邑盜衆解散陞浙江布政司叅政適浙西海潮爲害蕩沒田廬瓚分守其地極力拯恤民咸安之陟江西右

布以使湖廣左布政使益務簡儉省宴會止餽送官  
財民力一無所費嘗奉表至京不私謁當道當道益  
重之及入覲吏部尚書還菴楊公疏其治行爲天下  
第一 賜宴於禮部益異數云入拜應天尹應天爲  
京甸百司所需民苦於供應瓚以法節之減十之六  
七在應天甫三月超陞都察院右副都御史巡撫山  
東適兵寇之餘瓚示儉朴爲諸司先歲旱躬禱於岱  
宗雨輒應冬無雪復禱於華不注山下雪亦隨降東  
人德之疏言臨清一州既有戶部工部糧鈔管關兵  
備等官今所臨不過二倉又增內臣十五員民何以

堪下部知之 武宗南幸遣使賜瓚一品服六襲金帶一束瓚以無功不敢冒賞置官庫貯上疏辭未幾擢南京兵部右侍郎適逆濠叛瓚佐叅贊喬公謀畫禦之留都恃以無恐 世廟登極方謀任老成瓚以直道不合遂引年乞休允之 上念舊臣仍以所辭襲衣金帶畀瓚再賜金緋四襲白金五十兩以酬留都備禦之勞家居杜門却掃左圖右書劬嗜益篤雖鄉人罕見其面士夫過者輒就而問之享年七十瓚外貌古朴而内存沈靜蒞官御物一以簡鎮之人不

平居寡言至論經史辯政事則亹亹不倦與人



交既不苟取亦不妄予以是寡合其儉素出於天性  
雖貴而顯敝衣蔬食有寒士所不及然敦孝友恤弟  
姪酷於好學老而不怠所著有山東總志東宦錄雪  
洲詩文集各若干卷藏於家

顧溥

顧溥字宗泰先世自長沙湘潭徙揚之江都高祖諱  
成從太祖定天下累功擢後軍都督府右都督及  
從太宗靖內難封鎮遠侯仍前都督事贈夏國公  
謚武毅溥以成化癸巳嗣爵時年方十有三憲宗  
特命朔望朝謁尋以例與公侯伯幼少者入國學肄

業因涉獵經史尤精韜略習楷法間持節冊肅唐二  
王久之用薦掌五軍右掖弘治戊申 孝宗親耕籍  
田充三公行五推禮又以登極事往告岷王巳酉始  
有湖廣之命佩平蠻將軍印以行政令簡肅官屬才  
俊薦拔幾百人黜不職者稱是諸衛歲給柴薪及軍  
從錢悉拒弗納桑植安撫司土官殘虐苗人奪其印  
溥督兵捕得首惡釋其餘黨勿治貴州苗倡亂滇蜀  
道梗受命統諸路兵十萬討之先正紀律戒部曲侵  
掠比至境覘知逆順雜處檄不從亂者毋得驚擾由  
是四百餘寨皆獲保全分兵五路自帥精兵由間道

刻期並進賊駭愕奔潰生擒僞王妻子及諸僞官斬首百千萬級招還流徙五千餘戶修復爛土長官司奏朔都勻府二州一縣境內悉平上降勅獎勵詔班師還鎮論功加太子太保增歲祿二百石特賜誥命乞解兵柄疏三上被召總督團營掌前軍都督府事益持重守法與中貴臣閱視諸營內外官簡選軍士及督工修繕禁門城垣社稷壇事皆集以母喪乞假歸葬上命其弟錦衣衛千戶淵代之行自出鎮至今官凡被賜白金文綺寶鏐佩刀蟒衣珍饌諸物不可勝計癸亥有疽發于背上命御醫診視遣中

官備物臨問六月十四日訃聞上震悼遣官諭祭者十有五給賻米百石布百疋令有司具棺槨治葬事賜諡襄恪

劉寧

劉寧字世安山陽縣人成化初世襲永寧衛指揮使以功累陞都指揮同知都指揮使充左叅將左副總兵擢右都督尋轉左挂平羌將軍印鎮守大同甘肅寧居邊三十年大小四十餘戰皆多取勝爲叅將守大同時遇賊鵠鵠峪霸王村四戰皆捷斬獲甚多威名自是大震賜勅獎勞爲副總兵時有虜酋挾數萬

人人貢陰蓄異志寧知之率二十騎躬詣賊營處  
疑不知所爲有勒馬引弓以待者寧以馬箠指畫宣  
布朝廷恩威復下馬與羣酋坐一酋語不遜寧掌其  
面奮臂而起酋首叱其酋退且留坐寧乃霽色呼酒  
與飲反覆開諭羣酋咸悟卒如約後復移鎮甘肅嘗  
繹古番兵之法以五十人爲隊隊五重爲陣建五色  
幟又各建五巨幟於中軍中幟出則同幟應之循環  
無端每戰用是取勝弘治十七年五月卒賜祭葬如  
例贈廣昌伯寧軀幹願偉勇略過人亦一時名將云

杭雄

杭雄字世威海門人成化甲子以總旗從征清水川  
克敵陞百戶弘治正德中數馘虜酋五遷至指揮使  
壬申陞署都指揮僉事奉勅勦賊四川守備甘肅西  
寧甲戌充延綏遊擊將軍隨總制太保彭公略定哈  
密丙子冬十月兵集岢嵐大破虜衆奏捷旌賜蟒衣  
一襲改叅將陞右軍都督府僉事統邊兵京操時  
毅皇帝狩宣大雄周旋扈從 上嘉其忠誠命佩征  
西前將軍印拜總兵鎮守大同頃之加特進光祿大  
夫右都督嘉靖初仍都督同知以延綏河曲虜數出  
掠改佩鎮西將軍印鎮其地明年陞後軍都督府事

會審夷讐亂告急朝議薦其梟略奉溫旨褒諭宴餞  
授平虜大將軍印節制陝西延綏寧夏甘肅四鎮軍  
務同兵部尚書金公撫勦廕祿錦衣千戶乙酉復佩  
征西將軍印出鎮寧夏己丑年七十有一解組歸庚  
寅七月以疾卒雄性彊猛接人謙和機謀內含質樸  
外著扼衝突戰奮臂先倡料敵揆策舉合陰符嘗逐  
賊涉河一賊急握其兩手水中鬪力撲賊殺之一日  
以數騎出值賊稍衆雄令悉下馬取馬鞍爲壘跪射  
賊退解衣腋中落血塊如林蓋中飛矢不自知也又  
能同士卒甘苦恤貧摩痛若保嬰孺羌胡部落知杭

大帥名望風嚆指旣老益銳官雖極品勛績而非惡  
自持不爲驕奢 武宗幸大同見其羶惟然甚曰老  
杭酸窮乃爾邪會賊至 上親欲出擊雄叩馬諫曰  
今主人畜犬備盜也苟盜至主人自吠齧之奚用犬  
爲願聽臣等効犬力 上笑而止少給役都御史府  
旣貴每至府必不正席坐曰此當年役所也曷敢忘  
之初雄疾以積金授從子祿呼祿屢不來問故祿曰  
人貴富以利身也公日糲食衣不帛而余乃有之邪  
迨葬祿爲車僮幡施飯僧誦經識盛伎樂郊列廣筵  
燕饗送賓客費蓋以千金焉抑雄之德素有以感之



也

## 仇鉞

仇鉞江都人世指揮同知以功陞指揮使充寧夏遊擊將軍驍勇敢戰正德五年寘鐫反鉞陷賊中京師訛言鉞從賊興武營守備保勛者又與賊聯姻爲之外應李文正曰鉞必不從賊勛以賊故姻遂疑勛不用則諸與賊通者皆懼不復歸正矣白上用勛爲叅將以鉞爲副總兵討賊命下纔數日勛疏上言臣母及妻子俱在賊中臣義不顧家恨不飛渡黃河食賊肉謝朝廷鉞亦稱病卧陰約遊兵壯士候保勛楊

英諸兵至河上乃從中發爲內應俄蒼頭書童沒河  
潛入見鉞言諸兵已至河上列營鉞嗾人謂賊何錦  
宜急出守渡口防決河灌城遏東岸兵勿使渡河錦  
果出而留賊周昂守城鉞又稱病亟昂來問病鉞猶  
堅卧呻吟言旦夕且死蒼頭卒起捶殺昂斬首鉞起  
披甲仗劍跨馬出門一呼諸遊兵壯士皆至遂奪城  
門擒寘鐸事平充總兵寧夏封咸寧伯食祿千石與  
世券仍總兵方寘鐸之變朝廷遣張永同楊遂菴將  
兵出討遂菴謂永曰寧夏事不足平仇鉞在彼不久  
當有捷報蓋鉞自列校楊公識拔以起者其蚤受知

于大賢如此七年充平賊將軍征流賊功進侯與世  
參加縣百石十六年子恩病恩子鸞嗣侯以罪誅